

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI SELASA, 21 FEBRUARI 2023, PUKUL 10.00 PAGI

Bil. 3

WAKTU PERTANYAAN-PERTANYAAN MENTERI

1. PR-1521-MQT1987
Datuk Seri Dr. Noraini Ahmad [Parit Sulong] minta **PERDANA MENTERI** menyatakan pendirian Kerajaan mengenai isu Pandora Papers yang telah timbul semula pada minggu lepas serta sejauh manakah siasatan dan tindakan susulan oleh Suruhanjaya Pencegah Rasuah Malaysia (SPRM), Bank Negara Malaysia (BNM) dan Polis Diraja Malaysia (PDRM) dilaksanakan.
2. PR-1521-MQT1983
Tuan Ahmad Fadhli bin Shaari [Pasir Mas] minta **PERDANA MENTERI** menyatakan apakah model yang digunakan dalam pembentukan konsep Membangun Malaysia Madani dan setakat manakah ia diaplikasikan secara rasmi dalam sistem pentadbiran Kerajaan dan dalam pelaksanaan dasar-dasar semasa Kerajaan.
3. PR-1521-MQT1976
Tuan Azli bin Yusof [Shah Alam] minta **PERDANA MENTERI** menyatakan adakah pihak Kerajaan bercadang meneruskan pembangunan secara menyeluruh Kampung Baru Kuala Lumpur seperti diusahakan oleh Mantan Menteri Wilayah Persekutuan Kerajaan Pakatan Harapan pada 2018 - 2020 dahulu agar selari dengan sasaran Kuala Lumpur Smart City 2030.

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI SELASA, 21 FEBRUARI 2023, PUKUL 10.00 PAGI

Bil. 6

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1521-L19469
Dato' Ramanan Ramakrishnan [Sungai Buloh] minta **MENTERI PENGANGKUTAN** menyatakan adakah bas pengantara akan digandakan di stesen-stesen termasuk penambahan laluan bas '*feeder*' kerana masih ada penumpang yang masih menggunakan khidmat '*grab*' dari stesen ke rumah dan ini hanya merugikan sebaliknya dari segi kos akhir walaupun pas bulanan yang sedia ada adalah menguntungkan rakyat.
2. PR-1521-L18778
Tuan Haji Mohd Hasnizan bin Harun [Hulu Selangor] minta **MENTERI BELIA DAN SUKAN** menyatakan bantuan dan sokongan yang dapat diberikan kepada akademi sukan dan permainan yang dikendalikan oleh bekas pemain negara.
3. PR-1521-L19449
Tuan Onn bin Abu Bakar [Batu Pahat] minta **MENTERI SUMBER MANUSIA** menyatakan bilakah penyelarasan latihan TVET (*Technical Vocational Education Training*) antara KPM dengan Kementerian-Kementerian yang lain seperti Kementerian Sumber Manusia, Kementerian Kemajuan Desa dan Wilayah akan dilakukan. Didapati banyak pertindihan kursus yang berlaku dan membawa kepada pembaziran sumber manusia dan kewangan. Kerajaan PH yang lalu pernah merancang melaksanakannya, ia diketuai oleh YB Permatang Pauh (ketika itu) tetapi terhenti kerana sebab yang telah menjadi sejarah.

4. PR-1521-L18832
Tuan Wan Razali bin Wan Nor [Kuantan] minta **MENTERI PEMBANGUNAN KERAJAAN TEMPATAN** menyatakan jumlah projek perumahan baru serta bilangan unit rumah mengikut pengkelasan kategori rumah di seluruh negara bagi tempoh lima tahun terakhir.
5. PR-1521-L18297
Tuan Haji Aminolhuda bin Hassan [Sri Gading] minta **MENTERI LUAR NEGERI** menyatakan apakah langkah-langkah yang telah diambil dalam memastikan keselamatan rakyat Malaysia yang telah menjadi mangsa scam di luar negara terutama di Myanmar.
6. PR-1521-L18135
Dato' Sri Dr. Haji Ismail bin Haji Abd. Muttalib [Maran] minta **MENTERI KESIHATAN** menyatakan apakah langkah segera yang diambil untuk menghalang penghijrahan kelulusan perubatan (Doktor) mendapatkan pekerjaan keluar negara seperti berlaku baru-baru ini dan berapa ramai lagi doktor-doktor kontrak yang belum diberikan taraf tetap.
7. PR-1521-L19184
Tuan Tan Kar Hing [Gopeng] minta **MENTERI DALAM NEGERI** menyatakan pendirian Kerajaan tentang cadangan untuk mewajibkan pemakaian kamera badan kepada ahli penguat kuasa PDRM bagi memelihara integriti, ketelusan dan profesional ketika berdepan dengan masyarakat.
8. PR-1521-L19316
Tuan Zakri bin Hassan [Kangar] minta **MENTERI BELIA DAN SUKAN** menyatakan apakah tindakan-tindakan yang telah dijalankan oleh KBS bagi mendekati golongan belia di kawasan luar bandar.
9. PR-1521-L18241
Tuan Haji Yusuf bin Abd. Wahab [Tanjong Manis] minta **MENTERI KEMAJUAN DESA DAN WILAYAH** menyatakan memaklumkan apakah Kerajaan masih lagi meneruskan projek bantuan rumah PPRT kepada penduduk B40 yang memerlukan rumah. Berapakah jumlah rumah PPRT yang telah dirancang untuk Parlimen Tanjong Manis pada tahun ini.
10. PR-1521-L18799
Datuk Haji Awang bin Hashim [Pendang] minta **MENTERI SUMBER MANUSIA** menyatakan statistik terkini pelaksanaan program di bawah Pelan Induk Keselamatan dan Kesihatan Pekerjaan 2025 (OSHMP 2025) dan tahap keberkesanan dalam meningkatkan kesedaran berkenaan KKP dalam kalangan pemain industri di Malaysia.

11. PR-1521-L18537
Dato' Indera Mohd Shahar bin Abdullah [Paya Besar] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah perancangan jangka pendek, sederhana dan panjang Kementerian untuk merealisasikan agenda peralihan sistem tenaga kepada tenaga boleh diperbaharui (*Renewable Energy*) dapat dijayakan tanpa membebankan rakyat dan alam sekitar dan nyatakan garis masa yang telah ditetapkan.
12. PR-1521-L18165
Dato' Azman bin Nasrudin [Padang Serai] minta **MENTERI KESIHATAN** menyatakan langkah yang diambil oleh Kementerian untuk memastikan golongan doktor muda dan pegawai perubatan memilih untuk terus bekerja di dalam negara berbanding luar negara.
13. PR-1521-L19048
Tuan Chong Chieng Jen [Stampin] minta **MENTERI PEMBANGUNAN KERAJAAN TEMPATAN** menyatakan adakah langkah diambil untuk memastikan semua pili bomba di kawasan Bandar Kuching dan Stampin adalah dalam *working condition*.
14. PR-1521-L19148
Tuan Che Alias bin Hamid [Kemaman] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan kerangka polisi dan dasar yang akan diberi penekanan dalam portfolio alam sekitar, perubahan iklim dan sumber asli selaras dengan Matlamat Pembangunan Lestari (SDG).
15. PR-1521-L18056
Datuk Ir. Shahelmey bin Yahya [Putatan] minta **MENTERI BELIA DAN SUKAN** menyatakan perancangan untuk membina stadium mini di daerah Putatan.
16. PR-1521-L19267
Datuk Ali anak Biju [Saratok] minta **MENTERI KEMAJUAN DESA DAN WILAYAH** menyatakan :-
 - (a) status terkini projek penyambungan bekalan air terawat ke kawasan Ulu Roban bernilai RM14.3 juta yang telah diluluskan pada suku ke-2 tahun 2021 oleh Kementerian Pembangunan Luar Bandar (KPLB) dulu; dan

- (b) bilakah proses tender dan pembinaan akan bermula pada bulan Februari 2021, difahamkan bahawa projek ini melalui proses reka bentuk yang telah bermula pada November 2021. Manakala proses tender dijangka akan dijalankan pada suku ke-3 tahun 2022. Dijangkakan projek boleh bermula pada penghujung tahun 2022 atau awal tahun 2023. Adakah garis masa ini masih diguna pakai.
17. PR-1521-L18382
Puan Syerleena binti Abdul Rashid [Bukit Bendera] minta **MENTERI PEMBANGUNAN KERAJAAN TEMPATAN** menyatakan bagi mengawal aktiviti inap desa yang semakin menjadi trend apakah tindakan Kerajaan terutamanya Kementerian Pembangunan Kerajaan Tempatan dalam memastikan penyelarasan undang-undang di peringkat negeri yang mampu mengawal dan memberi keselesaan kepada semua pihak terutamanya komuniti setempat yang banyak terkesan dengan aktiviti ini.
18. PR-1521-L19201
Datuk Seri Dr. Ronald Kiandee [Beluran] minta **MENTERI DALAM NEGERI** menyatakan sejauh manakah kerja sama serantau dengan negara-negara jiran dalam membanteras sindiket pemerdagangan manusia serta adakah terdapat usaha untuk mengeluarkan Malaysia dari status *Tier 3* dalam *US State Department Annual Human Trafficking Report*.
19. PR-1521-L18763
Dato' Muhammad Bakhtiar bin Wan Chik [Balik Pulau] minta **MENTERI SUMBER MANUSIA** menyatakan berkenaan sindiket kos pengambilan pekerja asing yang begitu tinggi dan apakah jaminan Kementerian agar isu ini tidak berulang lagi.
20. PR-1521-L18586
Dr. Hajah Halimah Ali [Kapar] minta **MENTERI PEMBANGUNAN KERAJAAN TEMPATAN** menyatakan tindakan Kementerian menangani isu kilang dalam dan sekeliling kampung tradisi yang menyebabkan pencemaran alam sekitar, keselamatan penduduk, masalah berkaitan warga asing dan trafik khususnya di Kapar.
21. PR-1521-L19319
Tuan Lee Chuan How [Ipoh Timur] minta **MENTERI KESIHATAN** menyatakan peratusan bulanan kes-kes kecemasan kritikal yang menunggu 1 jam atau lebih sebelum ambulans tiba daripada perkhidmatan ambulans Kementerian Kesihatan Malaysia daripada Januari 2013 sehingga Disember 2022.

22. PR-1521-L18427
Tuan Wong Chen [Subang] minta **MENTERI KESIHATAN** menyatakan garis masa Kementerian untuk menggubal Rang Undang-Undang Kawalan Produk Tembakau dan Merokok 2022.
23. PR-1521-L18511
Dato Henry Sum Agong [Lawas] minta **MENTERI DALAM NEGERI** menyatakan bilakah JPN di daerah Lawas dibenarkan untuk mengeluarkan Kad Pengenalan baru tanpa merujuk ke luar daerah.
24. PR-1521-L18402
Tuan Lee Chean Chung [Petaling Jaya] minta **MENTERI KESIHATAN** menyatakan adakah Kementerian bercadang untuk membina hospital awam di kawasan Parlimen Petaling Jaya yang mempunyai purata penduduk sekurangnya 700,000 orang serta adakah Kementerian berhasrat untuk membaiki atau menambah klinik kesihatan untuk mengatasi kesesakan pesakit di hospital dan klinik utama yang lain.
25. PR-1521-L18452
Tuan Lo Su Fui [Tawau] minta **MENTERI KESIHATAN** menyatakan status terkini pembinaan Hospital Besar Tawau dan bilakah tarikh akhir siap pembinaannya memandangkan hospital ini merupakan keperluan yang mendesak kepada penduduk Tawau.
26. PR-1521-L18992
Tuan Sabri bin Azit [Jerai] minta **MENTERI PEMBANGUNAN KERAJAAN TEMPATAN** menyatakan perancangan rumah mampu milik (PPR) untuk rakyat B40 di seluruh negara.
27. PR-1521-L18567
Puan Teresa Kok Suh Sim [Seputeh] minta **MENTERI DALAM NEGERI** menyatakan senarai kategori kesalahan bagi banduan yang telah dijatuhkan hukuman mati di penjara Malaysia sejak tahun 2000. Nyatakan berapa di antara mereka telah terima pengampunan daripada Raja-Raja atau Kerajaan negeri.
28. PR-1521-L19059
Tuan Mohamad Shafizan Haji Kepli [Batang Lupar] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status terkini pelaksanaan projek tebatan banjir dan kawalan hakisan pantai di Kampung Semarang serta kawasan-kawasan lain di Parlimen Batang Lupar.

29. PR-1521-L18334
Tuan Haji Muhammad Islahuddin bin Abas [Mersing] minta **MENTERI KEMAJUAN DESA DAN WILAYAH** menyatakan status terkini projek pembangunan perumahan rakyat termiskin (PPRT) di Parlimen Mersing yang telah diluluskan oleh Kerajaan terdahulu.
30. PR-1521-L18482
Puan Rodziah binti Ismail [Ampang] minta **MENTERI PEMBANGUNAN KERAJAAN TEMPATAN** menyatakan apakah perancangan Kementerian untuk memposisikan Pesuruhjaya Bangunan (COB) sebagai sebuah jabatan di Pihak Berkuasa Tempatan bersesuaian dengan punca kuasa dan ruang lingkup tanggungjawab di bawah Akta 757 agar pengurusan strata dilaksanakan dengan efisien dan tuntas.
31. PR-1521-L19099
Tuan Zahari bin Kechik [Jeli] minta **MENTERI DALAM NEGERI** menyatakan bilangan tangkapan penagih dadah di kalangan anak muda di seluruh negara pada tahun 2021 dan 2022, dan perancangan Kementerian untuk membendung masalah sosial ini daripada menular.
32. PR-1521-L18483
Dato' Verdon bin Bahanda [Kudat] minta **MENTERI KESIHATAN** menyatakan pelan pembangunan untuk menaik taraf kemudahan Hospital Kudat dan Hospital Pitas serta klinik-klinik desa yang terlalu usang di Parlimen Kudat terutamanya dari segi kekurangan doktor pakar bertugas, kemudahan ambulans dan kemudahan perubatan.
33. PR-1521-L19467
Tuan Kesavan A/L Subramaniam [Sungai Siput] minta **MENTERI SUMBER MANUSIA** menyatakan apakah perkembangan terkini Skim Khas Pembiayaan Rumah Pekerja Estet (SKRE) Ladang Elphil, Sungai Siput, Perak. Tanah 10 ekar yang telah diperuntukkan oleh Sime Darby untuk tujuan tersebut pada tahun 2020. Apakah status tanah dan projek tersebut.
34. PR-1521-L18714
Dr. Kelvin Yii Lee Wuen [Bandar Kuching] minta **MENTERI BELIA DAN SUKAN** menyatakan tentang pelan dan rancangan Kementerian secara terperinci untuk mencapai pingat emas Olimpik pertama untuk negara.
35. PR-1521-L18084
Datuk Seri Utama Hasni bin Mohammad [Simpang Renggam] minta **MENTERI KESIHATAN** menyatakan apakah langkah-langkah terkini pihak Kementerian bagi menangani fenomena malnutrisi dan obesiti dalam kalangan kanak-kanak di Malaysia.

36. PR-1521-L19167
Datuk Seri Dr. Haji Dzulkefly bin Ahmad [Kuala Selangor] minta **MENTERI DALAM NEGERI** menyatakan merancang pembinaan balai polis di Puncak Alam, Kuala Selangor yang mempunyai penduduk lebih 100,000 dan membangun dengan rancaknya.
37. PR-1521-L17954
Datuk Seri Panglima Dr. Jeffrey Gapari Kitingan [Keningau] minta **MENTERI PENGANGKUTAN** menyatakan bilakah Pelabuhan Kontena Kota Kinabalu - Teluk Sepanggar boleh diiktiraf sebagai Pusat Pelabuhan Nasional Ke-2 memandangkan ia boleh menjadi gerbang maritim yang penting ke BIMP-EAGA, berfungsi sebagai pintu masuk kepada pelbagai perkongsian ekonomi sedunia seperti Perjanjian Komprehensif dan Progresif untuk Perkongsian Trans-Pasifik (CPTPP) dan juga kepada Nusantara, Kalimantan, di mana ibu negara baru Indonesia sedang giat dibina.
38. PR-1521-L19447
Tuan Lim Lip Eng [Kepong] minta **MENTERI DALAM NEGERI** menyatakan status penubuhan Suruhanjaya Bebas Aduan Dan Salah Laku Polis (IPCMC) dan status anggota Polis Diraja Malaysia dilengkapi peralatan kamera badan (*bodycam*), berapa *bodycam* dibeli, jenis modelnya dan kos setiap *bodycam*.
39. PR-1521-L18503
Dato' Haji Shamsulkahar bin Mohd Deli [Jempol] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah terdapat rancangan Kementerian bagi menubuhkan suatu tabung khas sebagaimana model Tabung Amanah MARRIS yang dikhususkan untuk kos penyelenggaraan sungai dan saliran secara berkala bagi mengatasi isu kekerapan banjir.
40. PR-1521-L18401
Tuan Edwin anak Banta [Selangau] minta **MENTERI KEMAJUAN DESA DAN WILAYAH** menyatakan apakah status terkini projek Bekalan Air Luar Bandar (BALB) Kawasan Sg. Arip, Bahagian Sibul, Ulu Baoh dan Sebakong di Bahagian Mukah yang telah diumumkan pada tahun 2020.
41. PR-1521-L18836
Tuan Haji Kamal bin Ashaari [Kuala Krau] minta **MENTERI DALAM NEGERI** menyatakan adakah Kerajaan bercadang untuk meletakkan kebolehan membaca Al-Quran sebagai syarat penerimaan kemasukan untuk berkhidmat sebagai anggota PDRM bagi penganut agama Islam.

42. PR-1521-L18614

Tuan Prabakaran A/L M Parameswaran [Batu] minta **MENTERI DALAM NEGERI** menyatakan apakah Kerajaan berhasrat untuk memansuhkan atau mengkaji semula akta SOSMA iaitu penahanan terhadap individu tanpa bicara dan tanpa ikat jamin kerana ia telah melanggar hak asasi manusia. Adakah Kerajaan berhasrat untuk mengkaji semula hukuman bagi sesuatu kesalahan yang sama yang telah melalui prosiding mahkamah pada waktu yang sama tetapi hukuman yang dijatuhkan berjalan berasingan.

43. PR-1521-L18341

Puan Vivian Wong Shir Yee [Sandakan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rancangan Kerajaan untuk mengatasi kekurangan penjanaan elektrik yang kritikal di Pantai Timur Sabah, yang mana ia kini menghadapi margin rizab negatif lebih daripada 30%.

44. PR-1521-L18442

Tuan Wong Kah Woh [Taiping] minta **MENTERI KESIHATAN** menyatakan sama ada Kerajaan telah membuat apa-apa bayaran terhadap pembangunan dan penggunaan aplikasi MySejahtera setakat kini. Nyatakan apakah tindakan yang telah diambil oleh Kerajaan berikutan Laporan PAC yang dibentangkan ke dalam Dewan pada tahun 2022 berkenaan isu yang sama.

45. PR-1521-L18633

Dato' Ngeh Koo Ham [Beruas] minta **MENTERI DALAM NEGERI** menyatakan kenapa begitu banyak agensi-agensi penguatkuasaan dibenarkan mengambil tindakan ke atas nelayan-nelayan di laut.

46. PR-1521-L19355

Datuk Wira Hajah Mas Ermieyati binti Samsudin [Masjid Tanah] minta **MENTERI DALAM NEGERI** menyatakan status komitmen Kerajaan dalam memberikan keadilan kepada ibu warganegara Malaysia yang berkahwin dengan warga asing tetapi anak yang dilahirkan tidak mendapat taraf warganegara Malaysia.

47. PR-1521-L18279

Datuk Seri Dr. Noraini Ahmad [Parit Sulong] minta **MENTERI PEMBANGUNAN KERAJAAN TEMPATAN** menyatakan syarat-syarat untuk perlesenan penganjuran pesta ria (*fun fair*) dan aspek keselamatan di tapak pesta ria bagi mengelakkan kejadian seperti di Puncak Alam tidak berlaku lagi.

48. PR-1521-L19379
Dato' Dr. Alias bin Razak [Kuala Nerus] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan inisiatif yang bakal dilaksanakan oleh pihak Kementerian untuk memperluas sektor tenaga solar berskala kecil selain daripada program Pemeteran Tenaga Bersih atau *Net Energy Metering* (NEM).
49. PR-1521-L17975
Tuan Chow Kon Yeow [Batu Kawan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan pelaksanaan projek pembesaran Empangan Mengkuang Fasa 2B, adakah ia akan siap sebagaimana dijadualkan pada 13 Februari 2023. Jelaskan juga sebab Fasa 2C iaitu pembinaan Stesen Pam Lahar Yooi yang dinyatakan tidak berdaya maju untuk dilaksanakan memandangkan ia merupakan keperluan terutamanya selepas insiden banjir di Baling, Kedah. Apakah penyelesaian alternatif yang akan diambil.
50. PR-1521-L18603
Tuan Chow Yu Hui [Raub] minta **MENTERI DALAM NEGERI** menyatakan bilangan kes kematian dalam tahanan di lokap polis, penjara, depot imigresen berdasarkan jantina, umur, kaum (iaitu Melayu, Cina, India, Bumiputera bukan Melayu Semenanjung, Bumiputera Sabah, Bumiputera Sarawak dan lain-lain) dan taraf kewarganegaraan dalam tahun 2022.
51. PR-1521-L19109
Datuk Iskandar Dzulkarnain bin Abdul Khalid [Kuala Kangsar] minta **MENTERI PEMBANGUNAN KERAJAAN TEMPATAN** menyatakan usaha Kementerian dalam menangani isu-isu pembaikan jalan yang sering menjadi pertikaian antara pihak berkuasa tempatan atau jalan kampung.
52. PR-1521-L17969
Datuk Jonathan Yasin [Ranau] minta **MENTERI KEMAJUAN DESA DAN WILAYAH** menyatakan bilakah tindakan dibuat untuk membina jambatan Kg Lungkidau Ranau bagi menggantikan jambatan yang telah terputus akibat banjir sebelum ini. Permohonan untuk pembinaan jambatan ini telah pun dikemukakan kepada pihak Kementerian.
53. PR-1521-L18260
Tuan Manndzri bin Nasib [Tenggara] minta **MENTERI BELIA DAN SUKAN** menyatakan perancangan Kementerian untuk menggalakkan generasi muda menyertai dan aktif dalam gerakan belia berpersatuan bagi tujuan mendidik dan melatih kepimpinan, keorganisasian dan kesukarelawanan.

54. PR-1521-L18555

Tuan Riduan bin Rubin [Tenom] minta **MENTERI KESIHATAN** menyatakan langkah-langkah Kementerian untuk mengatasi masalah kekurangan peti beku mayat di Hospital Daerah Tenom sehingga terdapat mayat-mayat yang terpaksa disusun berhimpit dan dipindahkan ke Hospital Keningau.

55. PR-1521-L18005

Tuan Sanisvara Nethaji Rayer A/L Rajaji [Jelutong] minta **MENTERI KESIHATAN** menyatakan sama ada Kerajaan sekarang bercadang untuk menaik taraf Hospital Besar Pulau Pinang yang sudah mencapai kegunaan maksima sekarang.

56. PR-1521-L19085

Tuan Shahrizukirnain bin Abd. Kadir [Setiu] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status pelaksanaan projek Wakaf Air mengikut negeri dan adakah Kementerian akan meneruskan program ini.

57. PR-1521-L19474

Dato' Seri Hishammuddin bin Tun Hussein [Sembrong] minta **MENTERI PEMBANGUNAN KERAJAAN TEMPATAN** menyatakan peranan yang akan dimainkan oleh pakar Housing Development Board (HDB) daripada Singapura dalam menambah baik sektor perumahan di Malaysia.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. **Menteri Kewangan**

- * Rang Undang-Undang Perbekalan 2023.

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Datuk Seri Johari bin Abdul Ghani [Titiwangsa]** akan mencadangkan :

"Bahawa suatu ucapan yang tidak sepertinya dipersembahkan kepada Kebawah Duli Yang Maha Mulia Seri Paduka Baginda Yang di-Pertuan Agong, demikian bunyinya : -

"Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong semasa membuka Penggal Kedua, Parlimen Yang Kelima Belas."

Menyambung semula perbahasan atas masalah (20 Februari 2023)

2. (D.R 1/2023) Rang Undang-Undang Pencetakan Teks Al-Qur'an **Bacaan Kali**
(Pindaan) 2023. **Yang Kedua**

[Menteri Dalam Negeri]

3. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan *dron*. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

4. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

5 PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

6. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

7. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

8. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

9. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

10. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

11. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

12. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

13. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

14. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

15. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

16. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

17. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

18. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan di dalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

19. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

20. PR-1521-U(27)227

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

21. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancia daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada

golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

[Menteri Pertanian dan Keterjaminan Makanan]

22. PR-1521-U(27)229

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcaj sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

23. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN 2022</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 178	Laporan Tahunan Dan Penyata Kewangan Universiti Malaysia Pahang Bagi Tahun 2021	21 Februari 2023
ST. 179	Laporan Tahunan Dan Penyata Kewangan Agensi Kelayakan Malaysia Bagi Tahun 2021	21 Februari 2023
ST. 180	Laporan Tahunan Dan Penyata Kewangan Bank Simpanan Nasional Bagi Tahun 2021	21 Februari 2023
ST. 186	Laporan Tahunan Dan Penyata Kewangan Kumpulan Wang Simpanan Pekerja Bagi Tahun 2021	21 Februari 2023

****UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 21.02.2023 (Selasa)	1. YB Puan Vivian Wong Shir Yee (Sandakan)	1. Keperluan Segera untuk Menyediakan Lebih Banyak Rumah Projek Perumahan Rakyat (PPR) di Sandakan	1. YB Menteri Pembangunan Kerajaan Tempatan
2. 21.02.2023 (Selasa)	2. YB Datuk Seri Dr. Noraini Ahmad (Parit Sulong)	2. Isu Penyelenggaraan dan Naik Taraf Saliran Pengairan di Mukim 1 Lubok hingga Mukim 3 Peserai, Batu Pahat	2. YB Menteri Sumber Asli, Alam Sekitar Dan Perubahan Iklim

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**